

Cognoscer la istituzions

N muie de jent tol pèrt a la "scola politica" endrezèda da la UAL. En lunesc i sorastanc Mirella Florian e Roland Verra à rejonà del sistem scolastich te Fascia e ti lesc ladins del Sudtiroi



La secretèra de la UAL Teresa Lorenz con i reladores Mirella Florian e Roland Verra che à rejonà de la Scola Ladina.

Sozieta - La é dò a aer dassen n bon ejit, la "scola politica" de l'Union Autonomista Ladina, con gran sodesfazion de la neva secretèra politica de la UAL Teresa Lorenz, che l'à voluda e portèda inant con gaissa per chierir de arvejinèr i joegn a la vita zivila e sozièla de la comunanza, pean via da la cognoscenza de la dinamiches, de la normes e de la istituzions, ajache apontin l'ignoranza sun chisc temes fèsc scì che de spes i joegn se pesime a se dèr jù te la vita publica. Enveze, ence en vista de la litazions aministratives che sarà del 2010, aer jent disponibola e mingol enjignèda l'é fondamentèl per ge arseguir a noscia val n bon davegnir.

Presciapèch na carantina de jent, la maor pèrt joegn ma ence vèlch un manco joen, se à binà da la metà de otober ogne lunesc te la senta de la UAL, olache relatores da chiò o rué da foravia à rejonà de la reijes storiches de noscia autonomia, de

n model dialetich per la politica e l'herit e de la defendura de la mendranzes te la provincies de Trent e de Busan. La scontrèdes jirà inant en lunesc ai 23 de november con l'avocat Bepe Detomas che rejonarà de "I deric di ladins"; en mercol ai 25 Simone Penasa e Fulvio Cortese rejonarà de "Aministrations locales e promozion de la mendranzes. L sistem de la autonomies e i mecanismes de la raprezentanza politica" e per fenir en lunesc ai 30 Andrea Rizzi rejonarà de "La defendura costituzionèla de la mendranzes".

E lunesc passà Mirella Florian e Roland Verra, sorastanc de la Scola de Fascia e de la Scoles di lesc ladins de la Provincia de Busan, à prejentà i doi desferenc sistemas scolastics. Mirella Florian à portà dant numeres, obietives, carateristiches e projec de la Scola de Fascia, rejonan de na scola che vel se meter en jech e esser n muie

leèda al teritorie, che jà laora delvers en cordanza con altra istituzions, en particulèr con l'Comprenjorie e con l'Istitut Cultural Ladin, per portèr inant na politica linguistica coordinèda, e che speta èrs che vegne metù sù l'Comun General e nominà l'"Consei General per l'Educazion e la Formazion", organism de goern de la scola de Fascia pervevù da la lege.

Roland Verra à recordà en curt coche l'é nasciù la "scola paritetica" desche compromis politich anter todesc e taliegn, e l'à spiegà la desferenzes che l'é te Gherdena e Badia respet a la scola de Fascia per chel che vèrda i oraries, la दौरa di lengac e la prezedenzes e resses de posé tel reclutament di insegnanc. Verra à ence envià la comunanza de Fascia a desfrutèr ches moment politich, che per chesta Val l'é dassen emportant e positif, recordan che l'level de autonomia conta più che de gran strutures.

Duc doi i Sorastanc à palesà, anter l'auter, l'besegn che i atestac de cognoscenza linguistica vegne uniformé ence per l'ladin ai livie de valutazion europeans di etres lengac (A1, A2 e c.i.) e che sie maor colaborazion anter la scoles de la valèdes ladines: apontin per ches l'é stat pissà de meter sù na Consulta di Sorastanc de la scoles di raions ladins (ence de Belun).

A la basa de chesta colaborazion che à jà abù ejic positives con projec soraldut anter la Scoles d'èrt ladines de la trei provincies, à dit chiaramenter Roland Verra, l'é fondamentèl che la jent ladina posse se spostèr liberamente te so raion sorafora i jouves, e che se vegnarà metù sù n daz per i foresc, i ladins i vegne ejenté patoch da ches paament. (lg)